

INUIT ATAQATIGIIT

Inatsisartuni



1. marts 2024

UPA2024/56

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Filmiliornermi aningaasartuutit utertinneqartarnerat pillugu Inatsisartut inatsisissaattut siunnersuummik saqqummiussinissamik Naalakkerusisut peqquneqarnissaat pillugu Inatsisartunut aalajangiiffigisassatut siunnersuut. Inatsimmi nunatsinni filmiliornermi aningaasartuutit 25 %-iilik utertitsinissaanissaq pisinnaangortissavaa, maannalu aningaasanut inatsimmi oqaasertaliussa qaqutigalugu maleruagassiorneq taarsissallugu.

(Inatsisartunut Ilaasortaq Peter Olsen, Inuit Ataqatigiit)

Tungavilersuut:

Nunatsinni tanngassimaarutissatta nuannaarutissattalu ilaat tassaavoq nunatsinni eqqumiitsuliortorta pikkorissigaluttuinnarnerat amerligaluttuinnarnerallu. Assersuutigiinnarlugu 2019-mi Nuummi filmiortortarfiup pilersinneratigut filmiortarneq soqutineqaleraluttuinnarpoq filmiortartullu amerliartuaarusaaginnersimallutik.

Ukiuni kingullerni, filmiliorfissuarnit nunatta avataaneersunit, nunatsinnut tunngasumik, filmiliornerminnilu nunarput locationitut atussallugu soqutigiinninnerat annertusigaluttuinnarpoq. Oqaluttuarisaanerup ingerlanerani, ilisimatusarnermut tunngassuteqartut, angalasarsimanernut tunngassuteqartut, oqaluttuarisaanermilu pingaaruteqartunut tunngassuteqartut filmiliarissallugit nunatsinni soqutigineqaleraluttuinnarput; Nuna issittoq, avinngarusimasoq inuilaarsuaq, avatangiiserpullu imaannangitsorsuaq, pinngortitarsuaq assissaqangitsoq pikkunartoq filmiliorluni avatangiiserissallugu assorsuaq pilerigineqarlunilu soqutineqaleraluttuinnarpoq. Minnerunngitsumik silap allanngoriartornera ilutigalugu nunatsinnut soqutiginnineq suli annertusigaluttuinnarpoq.

Assersuutigiinnarsinnaavoq Nikolaj Coster Waldau pingaarnertut inuttaaffigisimasaa 2022-mi filmi saqqummersoq Against the Ice. 1906-miit 1908-mut Mylius – Erichsen, Høegh Hagen aamma Jørgen Brønlundikkut Tunumi ilisimatusarlutik angalasimanerannut tunngassuteqartoq.

Pisimasoq oqaluttuarineqartorlu Tunumi pisimasuuvoq. Kisianni filmi Tunumi filmiliarineqarani, filmilerineqarneratali annerpaartaa Islandimi filmiliarineqarpoq. Tamanna assigiinngitsumik pissuteqarpoq.

Filmip annerpaartaa Islandimi suliarineqarsimavoq, Islandimilu suliarineqarsimaneranut pissutaasut ilaat tassaasorinarsinnaavoq, nunatta tikikkuminaatsuunera, nunatsinnut angalaniarnerup pisariunera akisuallaarneralu,

minnerunngitsumillu illoqarfimmi uninngavigisassami, unnuisarfinnut ulluinnarnilu inuussutissanut aningaasartuutaasinnaasut nunanut allanut sanilliullugit qaffasippallaarnerujussuat. Naatsumik oqaatigalugu nunatsinni filmiornikkut aningaasartuutaasinnaasut nunanut allanut sanilliullugit nunatsinni qaffasippallaarnerat nunatsinni filmiornissamut aporfiullutillu nangaalissutigineqartarput.

Nunani allani, filmiortarfissuit nunaminni filmiornissaannik kajumilersitsiniaallutik, filmiortut filmiortarnermi aningaasartutimik ilaannik utertitsisinnaanerannik inatsiseqarput aqqissuussisimallutillu. Soorlu unnuisarfinnut, neriniartarfinnut, nunaqavissunik sulisunik atuisimanernut allarpassuarnullu nunami tikitaminni aningaasartuutigisimasanik ilaannik utertitsisinnaallutik.

Nunatsinni utertitsisinnaanermut tunngatillugu periarfissaqaralarpoq, tamanna allassimavoq aningaasanut inatsisip iluani konto 24.10-ip iluani oqaasertaliusseq aqqutigalugu. Nalunaarusiamilli uuminnga suliaqartut; "Kalaallit Nunaanni filmiortarnerup qanoq ilillugu pitsanngorsaqaarneqarsinnaaneranut siunnersuutit" isumaqarput aqqissuussaq taanna naammangitsoq, ilisimaneqanngitsoq, kiisalu aqqissuussaq atorsinnaanngitsoq.

Aamma tassani nassuiaammi oqaatigineqarpoq, filmiortarnerup pillugu inatsit immikkut aammalu utertitsisinnaanermut inatsisissat immikkut tamarmik pilersinneqartariaqartut. Taamattumik utertitsisinnaanermut inatsisissaq una immikkut inatsisissatut aamma saqqummiuppara.

Inatsiliornikkut piumasaqataasut suussanersut allattorneqarsinnaapput. Inatsimmi aamma tassani nunaqavissut, nunatsinni innuttaasut kalaallit sulisorineqartarnissaannik piumasaqataasinnaasunik inatsimmi tassani aamma aalajangersaasoqarsinnaalluni.

Nunarsuatta sinneraniit nunarput filmiortarfigissallugu kajuminnarnerulersissagutsigu, nunatsinnilu filmiortarnerup annerusumik inuussutaanerulissappat, allaqqunneqarsinnaajunnaarpasippoq utertitsisarnerup pillugu inatsiliornissarput.

Tamannalumi aamma uppersarnerqarlunilu ersersinneqarpoq upernaapq manna 2023-mi inatsisartut ataatsimiinneranni Naalakkersuisuninngaaniit saqqummiunneqartumi uani; "Kalaallit Nunaanni filmiortarnerup qanoq ilillugu pitsanngorsaqaarneqarsinnaaneranut siunnersuutit"-ni. Nassuiaatitut aamma taaneqarsinnaasumi.

Nassuiaammi tassani siunnersuuterpassuarnik soqutiginartorpassuarnik ulikkaarpoq. Nassuiaammilu tassani ilaatigut oqariartuutigineqartoq tassaavoq filmiortarnerup silarsuaani utertitsisarnerup pillugu inatsimmik pilersitsisoqarnissaa. 25%-millu annertussusiliisoqarnissaa tassani aamma oqariartuutigineqarluni, nunani sanilitsinni misilittagaalersimasunut naapertuuttumik aqqissuteqartoqassappat.

Neriullunga siunnersuutigita ilassilluarneqarluni tigulluarneqarumaartoq.

Pisortanut aningaasatigut allaffissornikkullu kingunerisassai:

Inatsimmik suliaqarneq allaffissornikkut ingerlatsinermi AC-mik ilinniarsimasup nalinganik, tassalu 500.000 kr.-ninik naleqarumaartoq naatsersuutigineqarpoq.

Oqaatigiuminaappoq naatsersoruminaallunilu aaqqissuussineq taamaattoq nunatta karsianut qanoq kinguneqarumaarnersoq. Kisianni assersuutigalugu filmiliortartut katillugu 15.000.000.kr nunatsinni aningaasartuuteqarsimagunik, soorlu unnuisarfimmut neriniartarfimmut allanullu sullissinermit tunngasunut, taava tamanna nunatta karsianut 3.750.000.kr-nik naleqartussaassaaq.

Aningaasartuutigisimasat utertinnissaannut inatsimmi killiliussamik ilanngussisoqarsinnaavoq; taamaaliornikkut ukiumut aningaasartuutit utertissinnaasat killissalerneqarsinnaalutik; soorlu nunani allani assingusumik aaqqissuussisimasuni taamaaliorsimasut.

2024-mut aningaasanut inatsimmi konto 24.10. ataani oqaasertaliussani ilaatigut ima allassimasoqarpoq;

“Nr. 4-mut. Ingerlatseqatigiiffiit filmiliornermik suliallit Nioqqutissanik eqqussuinermi akitsuutit pillugit Inatsisartut inatsisaanni nr. 19, 30. oktober 1992-imeersumi § 1, 19-21 aamma 27-mi nioqqutissanut taaneqartunut eqqussuinermi ukiumi akileraarutinut A-nut, suliffeqarnermut akitsuutinut aamma eqqussuinermit akitsuutinut akiliutigineqartunut kiisalu Qamutit motorillit akileraarutaat pillugit Inatsisartut inatsisaat nr. 3, 16. juni 1987-imeersooq malillugu Kalaallit Nunaanni filmimik arlalinnilluunniit immiussinermit, tunisassiornermit il.il. atatillugu filmiliorfiup akiliutigisimasaanut 10 mio. kr.-t angullugit utertoorsinnaanerannut neriorsuiffiginissaannik Naalakkersuisut piginnaatinneqarput. Utertoorutissanik tunniussisoqassappat piumasarineqarpoq: 1. Qaammatisiutit malillugit ukiumi ingerlatseqatigiiffiup filmiliornermik suliallip akileraarutinut akitsuutinullu akiliutigisimasai 3 mio. kr.-nik qaangiissanngitsut. 2. Qaammatisiutit malillugit ukiup naaneraniit kingusinnerpaamik qaammatit pingasut qaangiutsinnagit qinnuteqaammik ukiup siuliani akileraarutinut akitsuutinullu akiliuteqarsimanermit uppersaatissanik ilalimmik Akileraartarnermit Aqutsisoqarfimmut nassiussisoqassaaq.”

Malugiuk piumasaqaataasup 1-ip ataani qallunaatua allatut allassimammat, qallunaatuaa aana issuaaffigaara;

“Det foreslås, at et selvstændigt filmproduktionselskab kun kan få refunderet A-skatter og afgifter på op til 10 mio. kr. per kalenderår, og at der kun kan udbetales refusion for et kalenderår, såfremt beløbet overstiger 3 mio. kr.”

Namminersortunut aningaasaatigut allaffissornikkullu kingunerisassai:

Siunnersuutigineqartup piviusunngortinnerigut filimiliortartut nunanit allaneersuusut Nunatsinni filmiliornissaminut soqutiginninnerulernerannik kinguneqarsinnaavoq; filmiliornerullu nalaani sumiiffimmi nioqqutissanik kiffartuussinernillu assigiinngitsunik pisisarnissaat naatsorsuutigineqarsinnaalluni.

Nunatsinni filmiliornerit amerlatippata nunatta takorniarfissatut nittarsaanneqarnera annertusisinnaavoq.

Taamatut aaqqissuussineq nunatsinni filmiliornerit suliaasaqarnerulernerannik misilittakkanillu katersinerulernerannik kinguneqarsinnaavoq.

Innuttaasunut aningaasatigut allaffissornikkullu kingunerisassai:

Soqanngilaq